

# Layangé rasul Yohanes

## Layang nomer telu

---

### Pamuji slamet

<sup>1</sup>Iki layang sangka Yohanes, pinituwané pasamuane, marang sedulurku Gayus, sing tak trésnani ing lair lan batin. <sup>2</sup>Pandongaku, muga-muga kowé nemua slamet, seger-waras ing badan, bisaa kaya enggonmu krasa-seger ing kasukman.

### Katrésnané Gayus

<sup>3</sup>Aku jan bungah banget krungu kabar sangka sedulur-sedulur sing wis pada balik sangka nggonmu. Sedulur-sedulur mau ngabarké bab katemenanmu marang pituturé Gusti Allah lan uripmu pantyèn ya tyotyok tenan karo pitutur kuwi. <sup>4</sup>Awit ora ènèng kabungahan sing gedéné ngungkuli kabungahanku nèk krungu uripé anak-anakku pada miturut pituturé Gusti Allah.

<sup>5</sup>Kanyaku sing tak trésnani, katemenanmu marang pituturé Gusti Allah ketarané sangka pelabuhanmu kanggo para sedulur tunggal Gusti, malah uga sedulur-sedulur sing kowé déwé durung kenal mbok rumati apik. <sup>6</sup>Ing pasamuane kéné wong-wong ya pada ngomongké bab katrésnanmu marang sedulur-sedulur kuwi. Pantyèn betyik banget enggonmu nulungi sedulur-sedulur, supaya bisa neruské kerjanané. Pitulunganmu pantyèn ndadèkké bungahé Gusti Allah. <sup>7</sup>Sedulur-sedulur mau pada ngerjani penggawéané Kristus lan pada budal tanpa njaluk sokongan apa-apa marang wong sing ora pretyaya. <sup>8</sup>Mulané, awaké déwé iki sing pretyaya kudu nyokongi sedulur-sedulur kuwi.

Mengkono kuwi awaké déwé bisa mèlu ngréwangi sedulur-sedulur mau enggoné pada ngabarké pituturé Gusti Allah.

<sup>9</sup>Aku wis nulis layang marang pasamuane, nanging Diotrifes, sing kepéngin dadi pengarepé pasamuane, ora gelem nampa, nanging malah nampik awaké déwé. <sup>10</sup>Mbésuk nèk aku teka aku bakal nggarap klakuané dèkné kuwi. Diotrifes kuwi ngolok-olok lan ngomong-omongké sing ora-ora bab aku lan sedulur-sedulur sing nyambutgawé kanggo Gusti karo aku. Ora namung kuwi waé, nanging wani nulak sedulur-sedulur sing pada teka arep ngabarké pituturé Gusti mbarang. Iku durung lega, awit sapa sing nampa sedulur-sedulur mau pada dialang-alangi lan dietokké sangka pasamuane.

<sup>11</sup>Gayus, sedulurku sing tak trésnani, aja niru tumindak sing ala, nanging sing betyik sing kudu mbok tiru. Wong sing nindakké sing betyik kuwi ngekèki tanda nèk wis dadi siji karo Gusti Allah, nanging wong sing nggawé ala kuwi ngekèki tanda nèk ora kenal marang Gusti Allah.

<sup>12</sup>Bab sedulur Demitrius kabèh wong namung ngomong apik. Kuwi pantyèn ènèng wujudé, awit awaké déwé ya namung ngomong betyik bab sedulur iki lan kowé ngerti nèk tembungé awaké déwé kenèng mbok pretyaya.

### Penutup lan pamuji slamet

<sup>13</sup>Sedulur Gayus, sakjané ijik okèh sing kudu tak rembuk karo kowé, nanging ora tak tulis nang layang waé.

<sup>14</sup>Pengarep-arepku aku ndang kepetuk karo kowé lan bisa omong-omongan adèp-adèpan.

<sup>15</sup>Seméné waé layang iki.  
Muga-muga Gusti Allah ngekèki  
ayem-tentrem ing atimu. Kantya-  
kanyamu sing nang kéné pada kirim

slamet. Dikirimké slamet uga marang  
kantya-kantya siji-sijiné sing nang  
kono.

Yohanes